

四庫全書

集部

欽定四庫全書

集部

石倉歷代詩選卷二百七至

詳校官庶吉士臣范逢恩

侍讀臣孫球覆勘

總校官進士臣朱

鈐

校對官中書臣葉

蘭

謄錄監生臣姚

舒

欽定四庫全書

石倉歷代詩選卷二百七

明 曹學佺 編

宋詩八十四

李昂英

送廣帥趙平齋汝暨解印趨朝

海瀕老同年五載依宇下春風舞蓑笠愛日曝田舍喜  
無撞塘吏追逐款段馬劇談許條褐得趣公餘暇達官

來三逕小隊隣翁詫明公傑俊人麟族稱大雅典刑式  
諸老胸次郁蘊藉西派邈其源境物入陶寫才高事無  
難隻手擘泰華乘輶始踰嶺風采賢使者堂堂開大閫  
部屬肅鞞帕臺端有老蜮闖影含沙射孤忠冕旒知還  
許河內借鈴齋安獨處冷淡閒僧夏例錢推不受金貝  
視土苴首祠酌泉翁坐使饗俗化葭萌細摩拊生意被  
原野循良渤海遂平理潁川霸威風戢偷竊德意銷詭  
詐能令颶母伏默禱雨師灑開倉散窮閭儉歲低米價

貢場宏敞拓庇士千間屢歷觀古賢牧美政公其亞讒  
夫真枉了有識共唾罵君子竟何傷徽譽愈膾炙詔還  
九棘班明發不俟駕傾城送津亭牽纜不忍捨老夫前  
致辭再拜進杯斚立朝要敢言切勿效喑啞此行衆所  
望盤石輦宗社

久住白雲呈鎮長老

桑下戒三宿我此尚留戀曹溪悟一夕我復無知見鎮  
公房遜客所須如執券園丁曉供茹行者時灌硯飯奴

更蕩馬紙帳費香篆主人真好事答應了無倦欲歸興  
未闌坐享伊蒲饌

觀定堂

梵宮凭水建蓬荻費芟除岸破羣魚出枝危獨鶴居定  
鐘僧睡早揮塵客談虛月滿龕燈小風停幡影疎供槃  
多佛菓僧飯飽園蔬惟有開山老清高閑草廬

送鄭雪屋歸里

征衣點落紅君去與春同負到歸時見吟多醉後工不

應冠尚鷗自許氣如虹急着看山眼飛帆吸快風

武夷觀

閒乘石罇船又到浙江邊回向初心地飯依古洞天成  
丹呼鶴舞噴酒起龍眠雨意偏留客茶瓜定宿緣

建倉解歸詩復徐意

吏擎雙印出便覺此身輕物我忘恩怨漁樵寄姓名笛  
聲黃犢背詩興白鷗盟故舊休相訝無書到帝城

景泰寺

樹合疑山盡攀緣有路通遠鴉追夕照低鴈壓西風瀑  
勢雷虛壑松聲浪半空凭欄僧指似漲霧是城中

觀穫

負郭平田澗秋深穫課勤短鋤行缺月多稼剪黃雲舊  
臘占三白今年稔十分太平村舍裏墮穗飽雞羣

雲泉亭

絕頂鬱其前寒崖噴玉泉亭成山補闕境勝我纔先樹  
杪江天接榕根石磴懸賞心遂連日合爲智仙傳



別陳庭

政喜論文子遽歸扶胥江口訪韓碑吟篇佳處南遊得  
行李輕如始至時石友秉心終可託山翁具眼遠相期  
勉旃辦取蘭闌捷四六供官且放遲

白雲登閣

白雲峰擁到危巔傑閣翬飛倚半天谷響頗疑吟木客  
潮回坐見變桑田幾重山隔幾重海一日身閒一日仙  
真樂無如會心處林花野鳥亦欣然

雲關觀月

山間未晚先得月料想城中見較遲  
海吐銀蟾漸呈露林垂翠影已參差  
孤輪涵澗安禪處明鏡當空沈籟時  
夜半衰翁猶獨坐清光吸盡入詩脾

登峽山疾風甚雨

長風吹裂碧雲堆捲取銀河瀉下來  
雨攬犀潭千尺浪煙遮龍壑一聲雷  
松翁偃蓋巖隈立猿女穿蘿洞裏回  
舊事蘭亭好拈出婆娑溪曲共流杯

西樵巖

巨石卷阿駕半天樵山風景豈虛傳  
水簾不捲四時雨  
丹竈空凝萬古煙  
印石尚存烏利跡  
問誰曾識紫姑仙  
我來遊徧登雲谷  
更借山僧半榻眠

碧霄

未到白雲先碧霄  
瘦藤支我上山腰  
煙橫遠樹醉眸豁  
竹引清泉塵慮澆  
酒滴松根和露飲  
茶烹石鼎抱茆燒  
平生不被利名鎖  
半掩柴扉聽晚樵

送舶使孫叔諧東歸

尊鱸高興趁新秋  
帆腹吞風湧去舟  
萬寶集登天子庫  
諸蠻遮泣海山樓  
世間顛倒是非夢  
達者逍遙得失侯  
歸到家林定重九  
團圓杯酒菊花浮

宴鳴珮亭和趙漕韻

數尺飛泉漏隔城  
寒巖坳處落琮琤  
懸知勝境無塵到  
却訝晴天作雨聲  
一軟不容貪者飲  
兩峰宜着醉翁行  
此泉千載因人重  
曾識風光霽月清

蒲澗滴水巖觀瀑

與可人遊五四并快風吹面洗炎蒸  
鹿巡夾道千章木猿掛垂巖百尺藤  
石室橫琴清振玉壺瓢酌水冷調冰  
瀑簾雨後籠山澗不許塵埃俗耳聽

送鑒師住靈洲寺

少年芹泮頂儒冠猛志緇袍出世難  
孤島一燈開佛屋長身七尺占僧單  
鐘鳴魚叩隨緣過棹舞鷗飛取次看  
亭下聽經入在否石欄搖影碧波寒

贈海珠湛老

也曾參破動風幡坐得形枯鬢早斑  
衲子指爲真鐵漢江神幻出小金山  
華亭浪急翻船入蔥嶺雲深挈履還  
香燼未寒行道處蕭森翠竹護禪關

羅浮洞長寶谷王寧素送藥瓢

久矣深山煉鶴形聞呼洞長又逃名  
斷崖怪木人稀跡亂石奔泉澗有聲  
劍定通神收古匣奕聊供玩戲紋枰  
藥瓢解贈寧無意重到孤庵論養生

蒲澗和東坡韻

四時冰柱濕風前絕頂飛來一派泉  
瘦蔓相牽根太古蒼崖特立探長天  
竈荒孤鶴尋遺跡寺老幽禽闔坐禪  
閒日頻遊歸復夢結廬曾許躡坡僊

四月十五日遊僧寺

今日快逢僧結夏不妨乘興扣禪扉  
山垂遠瀑溪聲急風捲癡雲雨脚稀  
囊錦詩成僧借看紋楸棋落鳥驚飛  
此來莫訝凭欄久傑閣新成拂翠微

送船使周申

堂堂山立舊朝簪久屈清流督獻琛風送連艘出獅國  
浪吹殘句到雞林平生不隔同年面中歲難禁惜別心  
歸見耆英定相問祇言閉戶萬山深

弋陽鄭氏翠麓亭

管領寒溪揖怪峰徑穿叢竹綠陰濃幽人去後無猿鶴  
冷落亭臺濕蘚封

雪封寺



征興六月度梅關  
大地清涼樹影斑  
行客不須梅止渴  
流泉到耳冷潺潺

石倉歷代詩選卷二百七

欽定四庫全書

石倉歷代詩選卷二百八

明 曹學佺 編

宋詩八十五

杜 範

夏夜雲月不明有感

天色未清霽浮雲翳層空朦朧玉盤質  
髣髴髣髴絮中瓊  
宇本瑩徹一髮不可容胡為受掩蓋萬象歸冥蒙誰能

召風伯掃氛有餘功中天懸清光娟娟萬里同

病中和東里寺中作

陋質百不能補敗倚師友東里丈人行幸忝巾屨後君  
詩如秋霽峭絕森碧岫又如萬古壑潺湲瀉寒溜一手  
轉機軸四顧無匹偶明窗一披讀張膽不論斗願分有  
餘光屢辱自醉酒徂暑變新涼一氣分六九逼仄塵區  
間蒸鬱未改舊心逐林泉佳病滋面目醜起來強力貧  
寧敢繼富有

# 募兵

召募古來有今者何其艱文書急如雨取辦都保間百夫不當十一夫費千鍰恐被嗜利徒無能禁國患老母與少婦蓬頭走江干挽之不得留悲泣聲徹天母曰我壯子婦曰我健夫衣裳破無補田園荒未鋤一朝棄我去饑寒我何如我欲同汝行生死同一隅抑恐情軍氣累汝重汝辜今業已分離把袂略須臾拭淚爲汝言汝亦無我虞戮力濟王功功成返故廬

戊辰冬和湯南萬韻

春初走京華秋杪歸舊廬簡編廢已久開卷澀且疎誰  
能擊其蒙石田或可腴鴈山有佳士讀盡天下書足跡  
半九州不憚道里迂陋邦何足臨而亦我來居相從一  
樽酒未厭園中蔬笑談欣有合浩若縱壑魚人生惟所  
適所適各有途胸中苟不迷到處皆通衢簞瓢有真樂  
顏氏何其臞沒沒嗟我生未知終焉圖論交須論心所  
論在不渝願君示一語令我反三隅君無金玉音請誦

一束芻

丁丑別金壇劉漫塘一首

黃綺避世翁萬乘輕商顏翻然爲羽翼國本安泰山出  
處義與比盛衰世相關懷古誦考槃令人欲長歎崇山  
鬱嵯峨千章自交陰培塿植松栢斧斤日相尋物小固  
不容名大亦難任智哉甯武子其愚非本心北風吹夏  
律草木塵沙昏枝葉曾未害根本難具論肉食謀何有  
家食徒殷勤誰能起東山掃翳扶朝暾川澤升爲雨霈

然周四郊有水行地中溉灌亦良勞勢力固有限憂哉  
加分毫爲義分內耳誰言薄雲高詞章道之華於世非  
少補施之匪其宜文繡被泥土自惜重立言一語萬鈞  
弩誰其厭來者是非實千古女蘿去長松籍籍紛委地  
矇眊辭詔相十步九顛躓弱昧慚陋質先生未終棄再  
拜願有聞服膺敢失墜人生玩歲月世事變朝暮三年  
在門牆一日泣岐路窗前長新綠生意自呈露願君日  
強飯安排濟時具



方山和篇再和韻

殷勤里社間談笑文字會平生一樽酒無慮千百醉問  
梅窮澗岡樂事此其最風霜盡木末冰雪對戶外誰其  
念岑寂自得以顛沛歲寒二三友已不數蒼檜卓彼方  
山翁自許行偕輩古心味玄酒於世百不嗜少小誦佳  
篇搜句亦奇矣年來久不作吾黨幾喪氣珠璧忽墮前  
疇昔曾夢寐三詠結束語坐令百感至來者恐未然往  
者非所計汗青幾名節徒起千載喟

張上舍送望水偶成小詩

我家東南隅去海不踰咫尺單潮厭鮮美望水快珍脆竭  
來雙溪上河魚僅青鯉泥滓漬膚肉強食輒三噉此物  
從何來對之驚且喜雖然喜雖然餒敗質尚餘江海味令人憶  
故鄉沽酒爲一醉

閒坐有感偶成古風簡劉會之高吉父康司理  
虞夏幾百載繼以周禮樂洋洋雅頌音後亡前亦作井  
疆貧富均薄海詠康樂姬公同聖賢積累亦不薄宜其

垂萬代整整守規彘寧知不數傳板蕩已非昨丘賦魯  
史書田疇鄭謗作滕君謾憂勤畢戰空唯諾盛古猶有  
憾此豈易商榷矧今千載後而欲強復剝州縣工罟罝  
黔黎惴溝壑世道日澆訛禁厲不可縛我嘗三太息浮  
雲翳碧落爲貧走塵埃豈解拯民瘼州家輕任使千鈞  
委羸惡勞瘁敢自愛恐負此邦託仁政安在哉名是意  
已錯治道去泰甚此論東州確人言寬一分所望恕且  
約嗟哉斯人生日巧亦日削俗吏事朱墨暴吏事鞭扑

我把七篇書人笑謂迂學誰與輸此懷濁浪渺垠壖

良月遊水樂

久矣聞水樂邂逅作此遊林立攢萬石曲逕穿深幽  
豁舒開古洞下有清淺流惜哉非古音噴薄皆人謀  
流觴飲山綠風鬢吹颼颼欲歸興未盡攜手湖上樓  
斜陽獻萬狀浩以百眼收白鳥去復還翩翩良自由  
我本山林人對此多慚憂歲月不我與宴閒其可偷  
便合作歸計老矣安所投世事皆漫爾政恐空白頭

送羅季能赴興國

句金與君別忽忽二十年君滋厲素節我已羞華顛轉  
物有玄機掃翳還青天羣耳共聳聽明詔方改元篤意  
召諸老高爵升衆賢執麾不可挽問君胡爲然一氣纔  
作新萬卉皆爭妍雪霜誰謂無松柏良自堅操心不厭  
危知機常慮先承流惠疲氓調俗暢新絃送日徒京塵  
班春勝著鞭顧我足尚縈羨君翩方翩數里已云隔千  
里其可前有懷空感惻何時解拘攣卓哉漫塘翁邈在

雲山邊煩君招衡門爲我致問偏萬牛應莫回世事如  
風鷺

鴈蕩

東南富山水傑氣鍾鴈峰巨靈排巖巖妙力開鴻濛斷  
崖據險絕峭壁凌寒空分岑獻萬狀轉盼無一同或疊  
如錦纈或鑄如青銅或前如舞鳳或却如飛鴻或伏如  
卧虎或矯如遊龍並如兄語弟差如兒隨翁銳如筆露  
穎岐如剪開鋒二湫分大小百靈儼西東古語聊近似

天巧難形容我久埋世埃幸此拔天風應接費耳目  
磊羅心胸有僧本儒家伴我追雲蹤攀躋不知勞指引  
殊未窮胡然便語別問之以涕從爲渠遊興盡生我歸  
意濃出計無草草回途復念念還此未了緣邂逅須有  
逢

送夏肯父赴補

之子問行李策足遊上都晚風吹客袂話別聊躊躇朝  
家渴多士璧水來英儒子志橫四海亦復隨羣趨磨礪

強國策他時告嘉謨卓彼漫塘翁一壑老壯圖萬牛挽  
不前世事付長吁君欲訪隱所爲問今何如

雪中成十一韻

入冬多癘氣陽洩月令暢隱雷聲間作萬蟄驚塞向數  
日凝重陰雲同寒威壯飛瓊偏天宇色界鋪寶藏前此  
亦屢白玉瑞此其初絨運孰主張一雪壓千瘴紛紛富  
家兒羔酒醉金帳誰思道丐者雙腳不堪餉顧我雖甚  
貧可挾尚有續蚤起願年豐共飽拜天貺天意然不然



獨立爲楚愴

中秋夜客退觀月謾成

檻外不數丈深宵藏丘壑壁月懸中天玉露下叢薄尺  
水澄秋光龜魚共余樂所樂亦伊何飲水良自覺恍若  
歸故山灑然謝羈絡明發將何之塵埃又如昨行也誰  
使之有此一大錯幸保寸心在舉頭問碧落

登山述懷

收淚別妻子登山望歸舟舟遠望不及巖溜鴈咿嚶重

跼坐絕頂晚色忽已稠  
淒其杜宇聲問我胡爲留  
撫襟獨浩歎淚下不可收  
三年足別離此淚良有由  
區區駒隙中爲形役不休爲形役  
尚可爲人役何求淵明獨何人  
我乃如拘囚老親方倚門  
甘旨誰供羞子幼未知學  
擇師誰與謀鬼蜮閃光怪  
虎豹嗥昏幽世路委叢棘  
吾道若綴旒豈無知我者  
應謂我心憂

和劉會之野堂韻

草草春又過淒晦風雨夕  
三年烏傷夢不斷一區宅  
台

山在何許空有塵滿屐  
英英江夏公老龍蟠古澤  
尋勝著幽宇搜奇列佳石  
可齊不出門亦復為渠役  
酒酣對崔嵬寸管凌千尺  
念我蕭寺中遠贈煩走力  
隱几讀妙句緬懷賓主席  
何當謝吏網足躡堂上客

詠芙蓉與菊花

秋光濃欲滴結束東籬花  
糝糝粉點綴戢戢相參差  
淵明太好事言樂酌流霞  
誰云制頽齡為與霜爭華  
映水開芙蓉麗色如春葩  
謾以拒為名青女不能加  
持此問

淵明何乃吝齒牙門外風如箭黃落滿天涯

送子謹叔

古道日凋敝人心競險薄風雨晦朝暮平陸變溝壑歸  
來尋故廬六窗靜猶昨殷勤時拂拭埃塵易侵剝此地  
寬且明休哉有餘樂

其二

聚首日嬉戲胡乃遽言別回首十年間坐令肝膽裂東  
陽古佳地先民有遺烈爲我一問之山寒水清絕無以

持贈君高秋千里月

送趙寬堂

兩片南山雲偶爾連空飛  
一去向空谷一留伴殘暉  
招浙江渡激激風吹衣  
仰頭有鴻鵠孰使心事違  
何時黃山畔把酒話昨非

新秋

大火西流日秋風戶到時  
斷痕依淺水疊翠別高枝  
氣每隨時改人應共物萎  
百年同一夢身後欲何爲

和澧州喜雨韻

秋色在何許浮嵐疊翠間江清雙鳥渡天濶片雲閒雅  
量肩文舉新詩壓子山更深聽遠溜哦咏荅濺濺

送鄭府判金字韻

巖嶇來北固邂逅識南金未覺人間役欣同物外心燈  
花殘夜半桂子落秋深細聽朱絃曲寥寥大雅音

和十九兄梅韻

空谷寒花好荒村野路長有懷尋往事無語攪枯腸老

氣猶無恙幽姿只自香  
喜君歌白雪茂對此新陽

道傍見梅

一樹棲殘雪不禁春夜霜  
香飄非寶篆粉褪厭時粧  
且合收餘白應難待晚黃  
自便籬落好榛棘不相妨

途中

官身驚昨夢山店是回程  
郡事關新舊人心屬送迎  
塵衫纔幸脫野服要須成  
世路如川險歸途却自平

有感

捧檄來茲邑勞勞兩載餘  
新庭千載隔家信十分疎  
有婦聞多病諸兒盡廢書  
低簷秋雨滴點點正愁予

舟早行將至三界偶成

辭京塵漸遠入越思逾清  
雨壑溪方漲風帆去復輕  
天光浮水濶山色帶雲橫  
更問鄉關路從今尚幾程

再次前韻

晨炊浮早渡午夜過錢清  
越國移舟便曹娥上堰輕  
人言三界近共指一山橫  
古剎明朝到籃輿數去程



又

厭見塵泥汨喜看沙水清魚攢隈日暖鷗去帖波輕寒  
渡人來少閒舟岸與橫漫須催去槳溪曲不論程

又

官喜文書少塵迷歲月遷豈無車可出儻有約宜堅傍  
水尋疎影裁詩讀細篇孤山須竟日莫去買遊船

水簾谷

巨崖森四立鈇洞露前簷鳥道穿危磴虬松奮老髯巖

高全似砌水小不成簾雖倦猶貪看中宵澗雨添

又和鄭府判韻

荆璞照耀非常珍天衢整步凌通津與人軒闢破畦畛  
滿懷拍拍無非春我如捩驥異遠道志在千里身未到  
竭來此地尋文盟平生心事爲傾倒飽德醉義樂有餘  
況有蘭玉芬庭除諧笑云云殊未厭盤飧夜半勞兵厨  
依依此情那忍去自恨塵鞍難久駐佇看飛詔自天來  
殿前賸作摩空賦

再次沈節推送春韻

子規泣訴春山頭芳草連天不盡愁  
紫陌遊人在何處  
空有顰眉人倚樓  
溪上悠悠棹木蘭  
溪邊落紅紛紛斑斑  
嗟哉片片逐流水  
新篁忽長千琅玕  
多少閒愁推不去  
欲問春歸杳無處  
少年知己負心期  
樽酒從今樂事稀

新秋

少昊行秋正疾驅  
灑然涼色已侵膚  
翠空碧水涵高下  
淡靄蒼煙半有無  
風露已經生慘戚  
菰蒲且欲慰斯須

誰將霜竹橫雲外似有悲聲與恨俱

繼和嚴君壁上韻

山舍猿楹朽蠹餘  
竭來小圃作閒居  
推移寧免人間世  
灑落還同心地  
初鷗鷺齊盟忘物我  
薜蘿交翠映簪裾  
恭惟不負傳心印  
已把浮生付六如

己巳登玉峰亭二首

與君携手上巒坡  
多少塵襟盡剝磨  
一鳥橫邊秋靄淡  
片雲歸處夕陽多  
潮來萬里翻明練  
山簇千峰列翠螺

此地不堪歸去早，佇看明月漲金波。  
杖藜無事歷危坡，一片清寒鏡面磨。  
極目盡時知水濶，置身危處見秋多。  
此時不着登山屐，到處還成測海螺。  
遙想高人閒物外，祇應不與世同波。

次韻草堂

心事崔嵬日不如，愁端叢起蔓難圖。  
殘山剩水風聲怨，落日微雲鴈影孤。  
妙句聳聞驚昨夢，寒窗細讀慰來蘇。  
許身已在羲皇上，降志猶能念昔吾。

又和鄭府判侯字韻

野人漫學事王侯官牒相從得後遊著眼丹鉛常午夜  
轉頭萸菊已深秋幾多陳迹成今古莫對清樽話去留  
自幸趨陪揮玉麈如今何止識荊州

得雪稱賀馬上得五十六字

昨夜同雲猶未合朝來一色變山河料應天上梅花早  
吹落人間柳絮多酒興自憐今老矣詩腸無奈此時何  
銀杯逐馬天階路何事閒江伴釣蓑

次趙貴方九里松獨行韻

道機已熟絕隄閑縱步來尋興裏山殘雪點衣消酒醉  
晚風吹鬢帶詩還妙年羨子歡踪足卑官愁余樂事慳  
安得相從塵網外快將如意碎青珊

和六十叔一絕

夕陽有意爲人留斜暎寒江著小舟遠目遙岑無限意  
不須蕭瑟賦悲秋

和趙山甫海棠

春風得意酌霞觴  
翠袖寧禁白露霜  
欲向月宮收賸馥  
曉窗強理背時妝

次沈節推送春韻二首

佳人憔悴怯春衣  
日暮樓高酒力微  
流水落花無限限  
千聲杜宇況催歸

一年春事逐飛蓬  
燕語千愁許未通  
水竹誰家深院落  
捲簾準擬納薰風

劉上舍攜酒有詩和真韻



數過流年轉矚中  
宦塵休更問窮通  
君詩喚我塵埃夢  
孤驛清燈一笑同

又

匆匆歲事又更新  
一氣初回萬木春  
獨有江梅殊不覺  
凜然冰雪照詩人

偶題

雪外亂山纔約略  
雨中平野更淒迷  
有人支枕蓬窗底  
卧看羣牛渡野溪

代菊對

未有淵明先有我何人喚我作淵明東籬宛在南山下  
誰向秋風管落英

和高吉父

麥隴吹風餅餌香桑畦映日繭絲光晚春好誦歸田賦  
問汝胡爲兩鬢霜

石倉歷代詩選卷二百八

欽定四庫全書

石倉歷代詩選卷二百九

明 曹學佺 編

宋詩八十六

葉 適

馮公此山民昔開此山居屈盤五十里陟降皆林廬公  
今去不存耕鑿自有餘風簟生谷隧雨旆來巖虛人隨  
亂雲入咫尺聲相呼四時草木香異數菓蔽腴採薪得

崖花結綴成襟裾此亦佳窟宅可對幽人娛何必種桃  
源始入仙者圖山中老白首名氏不見書我獨何爲者  
拊身念居諸

送鄭景元

兄弟同升難高材自催角官多復不記四載禮南嶽一  
朝盡室去非食遭歲惡丈夫軒豁意快緊出鷹鶚恐事  
得無慚信哉古人學建安雖閩壤桂樹美可樂合抱更  
連理叢生蔭州郭歲月歷悠長根株見齟齬終當作大

屢積功在雲壑尚友如此君蒼天未爲薄

靈巖

穹窿右俛眉天平左垂鬢吳人宅沮洳茲山抑其鎮表  
著非一朝突兀數尋仞樛松頗堅瘦立石乃榮潤魚有  
千里陂杳靄來遠韻宜乎登椒丘搔首思奮迅吳王未  
亡時絕色館孤峻歌聲妙欸乃俎品窮蛤蜊援琴固停  
晷解甲仍轉瞬終歸寂寞人破釜煮枯莖陳迹埋雪坑  
新愁損花信往來姑蘇驛空望孤塔近

北齊

頻年寄全吳解宇雜營保前廳久傾壓後舍歎倒常  
因霏雨後壁壞不容掃跳蛙浴漏瀦野穀媚穿杲以茲  
違色養先還愧親老低頭謾商歌瞪視豁愁抱當身良  
易足遺後非長道幸今脩整畢楹桶正完好晴窗閒晝  
永夜榻初涼早友朋坐雍雍燕雀鳴草草居室君子後  
車門固爲寶矧伊澤國士敗棟滅塗潦繆克使者屬職  
思振枯槁人之所歆羨未必天能造卷藏姑罷歸蠹簡

說剛浩

其二

人情無終極匪陋則求佳寢處既少安遊燕豈不懷惟  
思舊酒務糟醇荒榛埋破瓶聚隆垤新梵連長堦種竹  
夾西寮移花遶北齋及爾風露清忽感意象諧幽深容  
浪藥潤澤長芳茝吾留能幾日齟齬强安排方嫌樹影  
瘦復慮地勢仄世間香味悅每與腥膻偕俯同侏儒笑  
但恐好惡乖莫窮有限物徇此未腐骸

張氏東園送王恭父得殿字

燕鴻不相須進趣自求便余來君其館乃復當我餞一  
春三月雨亭樹鬱霧殿絮重厄飛楊花薦堆紫茜縱有  
百壺清何能一笑遣爲郎昔同甲四海初會面凜然抱  
英特霜宇搏溫霰雄辭推落筆一語不可選重來更純  
粹玉琢金就鍊漢家闡道術四達詔羣彥談經石渠觀  
會議白虎殿通方要歸宿立異豈夸衎子行若微罪天  
意委深眷以今能固辭可信非始戀楚熱宜縐締峽漲



難短牽回舟泊書林及此未掩卷

奉賦德脩西克大夫成都新園詠歸堂

浣花炫春溼濯錦絢晴浦成都信繁會此水工媚嫵豈  
無濠上亭蹇步難仰俯誓言違朝市卜宅近幽阻沃沃  
葵莧畦焰焰棠杏塢朝曦濕淺瀨暮色生遠渚循涯詠  
未厭引流絡其圃蘋荇依籬樊鳬鴈宿庭戶長松百里  
外物象爭渺莽時平乏隱淪簞笠自歌舞岷江志東向  
激射走吳楚胡爲傷滯淫習坎聖所許

宿石門

好溪瀉百壑南北傾萬峰山凡堆阜俗映岸羞爲容石  
門忽秀出老幹蔭渟洪捨舟從口入便已離塵中衆芳  
拱窟宅環崗獻奇穠藤蘿異態度尺寸疑施功錦茵翠  
織成照耀無春冬水行千丈高歟薄不可窮更有洗頭  
盆雲深霧常封昔年謝康樂築居待其終栖栖三羽衣  
日晏齋厨空來遊百世後歎息騷人風

陳同甫抱膝齋

昔人但抱膝將軍擁和鑾徒知許國易未信藏身難功  
雖愆歲晚譽已塞世間今人但抱膝流俗忌長歎

陽復

陽伏兵潛動雲袞日界明近傳新詔綽重起舊簪纓斗  
極回東指軍容直北營龍蛇多變化旋日看超昇

題費肅校書遺事

欲識隱居者當年費懿恭却辭金馬直歸卧錫山峰兩  
詔終不起一瓢長自從兒孫盡登第勿剪舊栽松

西山

對面吳橋港西山第一家有林皆橘樹無水不荷花竹  
下晴垂釣松間雨試茶更瞻東序綠空翠雜朝霞

送謝希孟

白頭趨幕府早已負平生未放鵬舒翼應煩驥歛程驛  
梅催凍蘂枕雨送春聲爲語常平使開懷待子荆

題郭希呂劉詠道遊鴈蕩詩後

隱劉甘隱淪老郭亦離羣自鎖魚亭月同穿鴈蕩雲排

峰造龍質懸水迸簾紋百種皆奇怪從君句裏分

送黃垞

有客家住寶劒窟將身自比夜明簾見我立談盡肝鬲  
駭視世俗徒沾沾千年豪傑供指使笑撻苗隸如奴鉗  
嗟余病衰絕少韻只欲炙背依茅簷勸子持難復居易  
呂梁之舟先歷試焦桐邂逅爨下薪良玉磋磨廟中器  
誰言怒海鯢鯨惡別有晴川鷗鳥戲心亨習坎行自孚  
安流儻寄相思字

寄題運使方公祠堂

投村宿店破鞍韉乞鹽放酒心拳拳南荒走徧得消渴  
玉井無藕何由痊今子名高壓蘇武暫來重覩經行處  
追思往事空泣然勝墨尚新牆壁護佛幢五丈留衣冠  
大書刻記詞辛酸神來正值荔枝熟神去還愁桂子寒  
吁嗟嶺民未知禮因君始拜令願泚從今簫鼓祭春秋  
福我如生首長稽

淨光松風閣

城中雲日如火催淨光行食聲轉雷不知何處白蘋起  
便有滿座清風來莫言作樓非急務翁當運斤兒執鋸  
待得三間着此風病叟扶攜上樓去

石經春秋一代奇寶王氏爲熙豐學廢不用瑞  
安沈彬老蠟而有之後世孫體仁閣以度焉  
余詠之

喟昔洛門初上石未及翻遭禁書厄沈公秘藏百載餘  
高樓突兀共堆積萬物散聚常橫陳汀花草從紛紜

海雲化雨龍正起想象向來悲獲麟

著存亭

馴鳥得食常好鳴靈芽無種還自生魂浮魄散莽何極  
耿若有見悲難平山脈迢迢繡峰住墓氣騰騰縷雲去  
鮫人抱寶夜出遊指點今來著亭處

鄱陽董李興往遊懷玉山捐田入寺爲民禱雨  
君既道其本末又示山中五章請余賦之然  
比來霖潦淹月種爛乃未殃也方幸數日晴



霽爾

懷玉湫龍懶心性六月困眠祈未醒  
廣文偶來亦同病買田施食殷勤請  
誰知領縣春風邊嗔蛟怒鰐腥薰天  
須君一念晴雨若遮莫雇僧輸俸錢

送白鄮還蜀

翻翻文若秋江生幽幽詩如寒澗鳴  
前歲淹徊下巴峽今年憔悴出京城  
憑問天邊五色羽何事飛來復飛去  
昔人但苦樊籠悲豈知此日籠無處

白紵詞

有美一人兮表獨處陟彼南山兮伐寒紵挑燈細緝抽  
苦心冰花織成雪爲縷不憂絕技無人學只愁不堪嫁  
時着鄭僑吳札今悠悠爭看買笑錦纏頭

送程傳叟

茂苑臺高春日明君顏如花楊柳青蕭條別離風雨外  
楊柳自青君貌改誰知仰天慙天公三辰五星在心中  
老作海頭新主簿蜃氣錯雜迷西東去年無禾雖種菽

乞命只指今年熟家人未可便喜歡少待上司催結局

送葉路分

猺啾獠唧聞鳴琴十指如玉無哀音應憐聽者未洗耳  
衡山高兮湘水深君今幅巾鵷鷺行切勿着帶貌虎傍  
軟荷刺少離棹短折桐葉多班露長

送潘德久

每攜瘦竹身長隱忽引文藤令頗嚴聞道將軍如卻縠  
不妨幕府有陶潛江當濶處水新漲春到極頭花倍添

未有羽書吟自好全提白下入詩奩

無相寺道中

傍水人家柳十餘靠山亭子菊千株竹雞露啄堪幽伴  
蘆葍風乾待歲除與僕抱樵趨絕澗隨僧尋磬禮精廬  
不知身外誰爲主更覺求名計轉疎

送曹潛夫

東南作闕數年徂遠遠參司到蜀都元帥幕中須受辟  
生羌界上也分符閒吟杜甫詩千字時載揚雄酒一壺

只我衰殘望君切杜鵑聲裏認歸塗

衢州雜興

山梅野雪掃成泥桃李紛紛照舊蹊  
行子束書輕駟馬主人炊蓐候鳴雞  
百年囹圄荒蓬藿萬里耕桑接町畦  
堪笑腐儒何用此只今飄轉楚江西

送喻太丞知處州

喻公策名自先朝奉常冬官始見招  
何因歛退爲泉石可惜垂翅排雲霄  
處州不城山作堵百嶂千峰自翔舞

孤高上頭天一柱中有秀句須公取

張總幹挽詩

長年官食旅邊州當路知音不自由  
薦墨雖圓人已寂半輪斜月返新丘

贈通川詩僧肇書記

海濶淮深萬里通吟情浩蕩逐春風  
却尋斗水龍湫住裁剪雲煙字字工

附劉燭詩

字雲莊

題李立父高遊樓

君家百尺樓近在環堵室室處豈不佳暑溽厭煩鬱著  
脚躡層梯心眼便超軼好風天外來佳月雲端出清明  
湛空濶洞視了纖悉豈徒快登臨抑可驗學術大哉天  
地心昭然本無物世人卑且隘動以私見室未能脫塵  
凡底處識微密羨君有斯樓發以靜春筆知崇與禮卑  
二義貫於一燭理要高明履道貴乎實庶幾足目具不  
但窺髣髴工夫妙方寸豈假身外役此墳未昭融此屋

空突兀君看希聖徒陋室暗蓬蓽

上陳縣尹

舊令龔熊負令名至今天日共清明案頭未有人稱屈  
村裏全無吏敢行滿院茶香敲句穩一簾花影韻琴清  
後之學者誰其似又說陳公政有聲

金國賀正旦使人到闕紫宸殿宴

榆關玉塞靜無塵嘉定於今第四春兩國交馳通好使  
八方同作太平人翠巖鼓奏娛嘉客白獸樽浮賞諫臣



聖歷從茲天共遠年年玉帛會楓宸

瑞慶聖節集英殿宴

皇家卜世過周唐天啓真人應運翔抱日預占恭邸夢  
飛龍曾報皖山祥翠雲影外來金母紅霧香中擁玉皇  
樂府賦工無以祝願將金鑑代珠囊

送王子文宰昭武堦

百鍊成繞指粹白俄成緇有初諒非難其難在終之道  
心眇絲粟易爲羣物移不有精一功誰能勝安危願言

保令德歲晏以為期

其二

平時州縣間上下意若異善書肘後掣有志奚由遂子  
今得所從展布有餘地兩賢更勗力萬物應吐氣相期  
召杜功奕奕昭來世

東宮

鶴駕通宵入問安龍墀清曉狎朝班天顏喜見重輪月  
春色先回萬歲山

皇帝閣

當宁求賢軫慮長  
每因佳節憶沈湘  
不須五色紉成線  
自有忠言補舜裳

石倉歷代詩選卷二百九

欽定四庫全書

石倉歷代詩選卷二百十

明 曹學佺 編

宋詩八十七

熊 銖

聞崇安縣學立碑

出山未踰月輒復入山去平生武夷志茲遊適真遇誅  
茅倘可遂豈但山水趣扶搖欣夙心躊躇動長慮恭惟

文公學倡道匪虛語向微剖析功斯人遂聳瞽齋居一  
原歎此歎無人寤晚年制作心門人未輕許真實浸沈  
寥枝葉謾誇詡漂淪未百年劇竊立門戶吾黨固有愆  
斯道自今古扶偏須忠臣邪說可無距同志此來遊興  
言激余素禮樂愧河汾興唐竟誰與大隱堂前水滔滔  
自東注回薄萬古心無言對天柱

上致用院李同知論海舶

易經致民用肇自義農先耒耜既生聚市易還懋遷公

私不交病本末無倒懸古人致主術稱物匪有偏厥初  
禹作貢不但中邦田四海自錫貢寧憚來往邊碣石來  
冀右海岱青徐連東南竝淮揚亦自江海沿夫豈寶遠  
物有道歸陶甄成周制國用半在周官編虞衡與商賈  
胡不末利捐艱難開國心什一猶欲蠲裒益固有道公  
功格皇天後儒不知學說理多虛玄生財昧大道民命  
日益脧管商一作俑蠹弊已千年漁鹽開抑末柰何誘  
開阡懷清一以築甬獨堪哀憐封君擅半賦公私重熬

煎寒機凍女手汗粒頰農肩織衣不上體春粟不下咽  
傷哉力田家欲說涕淚漣何如棄之去逐末利百千矧  
此賈舶人入海如登仙遠窮象齒徼深入驪珠淵大貝  
與南琛錯落萬斛船取之人不傷用之我何愆柰何昧  
輕重屑屑窮筭鞭鎔銖較驚股漏網魚吞船安得體國  
臣爲天握璣璇上資國脈壽下極民瘼瘼朝夕禹貢志  
菲食甘肱胼九載不入門千古孰與賢更想公旦心待  
旦尤乾乾世俗各與驕曾不絲毫牽所以泰和治常在



虞周前此道久已亡利欲克培埏豈曰治不及曾是心  
無傳明公中州傑自是天分全問學甚克厚願力還精  
堅博物功不勞無欲心湛然維此一樞軸實秉大化權  
如天有北斗物物歸璣璇帝念南海民風化舊所宣皇  
皇風霜節炳炳奎壁躔纖微亦何浼闔散有大權利用  
六府脩制用九府園古人不可作得意皆蹄筌誰哉識  
治本理此大化絃三代事寂寞念之心中捐書生武夷  
客偶此來海堧使者採風謠詩歌寓惓惓

春雨

春來一月雨米斗錢三千江空盡絕市竈冷厨無煙我  
從莆城來四望良淒然濱海皆食淡邏卒相尋挺纍纍  
起夫役庶局供熬煎玉食寧幾何千百俱並緣祇今二  
月節何暇及種田使臣詢民瘼當務固有先近倉有陳  
粟庶解朝夕懸

詠菊

廬峰幾千仞中有雲一龕千秋邈世人誅茅結爲庵我

嘗造其間追尋極幽探山中滿蘭蕙谷口羅松杉更有  
藥圃畦種菊杞與甘療病還延年未數菊水潭百年未  
云久澗草空毵毵我居北澗北子住南澗南偶然此隣  
竝妙處誰能參古來種菊人祇言晉陶潛當年移南村  
此地何所耽亦曰素心人可與共晤談云何舍之去我  
懷殊未諳八表方停雲處處迷征驂何如且歸來理此  
荒徑三歲晚永爲伴青松冠前巖保此霜下傑毋令澗  
懷慚

遊武夷山

我來武夷山遠意超千古嘗思混沌開疏鑿未經禹峽  
山猶古梁洪濤莽回互行舟留大壑營巢餘斷樹琅崖  
波濤痕隱隱皆可覩陶然上古民要服固深阻秦威何  
桓桓薄海猶廣土六合皆湧沸一枝豈寧處嘗言十三  
君隱隱避秦侶一日厭塵寰泠然遂高舉上山娛賓雲  
下山漏豺虎神仙何渺茫虹橋想虛語桃源亦其類好  
事自誇詡風氣日已開蛇斷出真主遂令閩山陬盡入

職方宇漢志名始彰祠堂用魚脯流傳世代久琳宮粲  
衣羽至今此名山號爲神仙府恭惟我遜翁辭闕厥功  
溥於焉卜精廬溪山九曲五圖書盡在是斯地儼鄒魯  
我以負笈生來茲有年數自慚仁智心未覩高深趣斯  
遊亦何意會心覲真遇侃侃平生友惠然肯來顧攜手  
敦風好抗志企遐慕招我山中遊茲遊適予素巍巍大  
隱屏屹屹天一柱前瞻晚對亭考槃固其所何當同心  
人相與雜榛莽長松期歲寒脩竹倚日暮我自愛此山

躊躇不忍去

陰字亭

湧翠豈蘭亭唐峰非山陰一渠疏曲水四野成茂林對  
此坐歎息超然起遐心當年諸王集幽情暢登臨虛曠  
非遠識絕勝名利襟近代翁李遊至理窮高深云何夸  
毗子清談且駸駸抗志有近遠撫事無古今此日復何  
日有酒始酌斟援琴不敢發誰歟爲知音

觀釣

暫停窗間詩觀此池上釣魚尾何沈沈竹竿何嫋嫋一  
絲波面動搖曳出深沼校人畜我時活我良謂厚作膾  
終當供設餌誠不料何當兩相忘萬里遊浩渺

上嚴廉訪

七閩天南陬實惟文明方天氣一以開文治何其昌我  
思常公化迪我真無疆開端固匪易再造伊誰當

其二

古人重民教禮樂用爲急虞書有三官周典猶二職太

學領奉常西都有餘責兩生既不來何參又無術

其三

漢興歷數世茲事竟未遑一絕不復續千載重慨慷  
房魏輔貞觀汗潘空流漿開寶襲唐陋儀儼負義方

其四

南方尚秉禮文風未云衰釋奠古雅樂鄉飲舊漢儀  
表章在正學舍魯將安之願言假良遇制作逢昌時

寄趙菊東山長三首



男兒貴神交何必見顏色大江有佳士夢寐不可得忽  
來幔亭間片雲不相識娟娟不在眼猶此一水隔

澹然幽貞姿乃是夕英菊托根九秋杪霜露淒已肅我  
疑靈均伴只有淵明獨采采黃金花豈意杜林曲

胡爲此不采却來泮水芹聖人望魯念彼黍車麟麟餘  
澤益孫氏管商何足論新畬有陳根猶是豐芭春

三山先賢祠落成

填宿久旅奎一朝開文治行歌閩水春芹藻見新意林

亭鬱還合祠宮敞宏麗欲賡泮宮頌且作鄉校義  
平地忽突兀敏手何神哉藹然色笑中見此通濟才入  
門知我心三歲猶初來祠典闕百世所貴重討裁

荒城步月

出門喜清曠興盡喚歸船攜手共明月知心惟老天暮  
潮生遠浦秋色滿平田落落男兒事相逢豈偶然

泊舟野望

樹色連雲色春歸物更妍落紅飄近岸新綠漲平川野

鸛窺魚笥沙鷗避客船斜陽江上立搔首意茫然

蒙泉

天池有佳水雲氣護深山我愛泓澄好人嫌澤潤艱暗  
空鳴滴滴高壁瀉潺潺漸近塵泥浣何時復此還

上劉治中

弱水流西河水東瞻烏爰止誰雌雄天地方閑何時通  
顛倒溷室成仙宮我羨仙人在高空絕粒輕舉乘天風  
養養不及真神龍人生剪羽樊籠中名尤利怨方相攻

忽聞海上蓬萊翁却來幔亭跨長虹願留徜徉羣仙峰  
塵寰渺渺知何窮

擣衣曲

北望悠悠音信少空房念遠心常早流螢煜煜夜稍清  
塞鴈嗁嗁寒已到細絲清水練方新在拋半濕日中明  
隔簾翁媼寐不熟月落尚聞砧杵聲將軍錦帳環歌舞  
百戰尚遲歸寸土老農肩米肉成瘡思婦裁衣淚成雨

送洛陽靳中事

銅駝巷陌棘風涼尚記東都舊帝鄉  
甲馬營空雲氣遠杜鵑聲老洛園荒  
天開地闢人才出風起雲飛汗竹香  
倘得行窩容我老春風借地種姚黃

聞讀書有感

萬疊青山鎖暮陰倚欄凝竚意深深  
趨時士女忻秦服學語兒童解楚吟  
當日繁華逐流水何年拱把秀穹林  
遼東俎豆銅川筮認取斯人萬古心

勉無咎

萬古綱常六尺軀可嗤杜老悔爲儒林間已聽鳩呼婦  
竹外行看鳳引雛倘有牛眠先卜兆豈無盤谷早營菟  
世間忙處應多錯盡把韋弦玩座隅

越州道中

野田秋澗響潺潺新翠喬林繞舍環淡月凝煙橫別浦  
斜風吹雨過前山柴扉初放牛羊出漁艇方攜螯蛤還  
自笑平生愛遊覽天教長在水雲間

客裏書事

西風涼信入虛簷。絺綌微單已戒嚴。鄉夢不隨秋夜永，客愁偏向雨聲添。清高鳴鴈低雲海，漂泊流螢傍竹簾。搔首寒燈樓舍悄，行藏自曉不須占。

蕪湖過繁昌旅舍蕭然偶書

竹窗漸白卷寒衾，上已纔過節物深。野杏外籬明望眼，萋蒿滿地藹愁心。已知賦分多行役，焉用詩鳴得賞音。春在江山無限好，緩驅羸馬度煙林。

平江舟中不寐

遠水瀟瀟荻葦風月明雲外叫孤鴻  
丹楓擁被疎篷底  
夢斷山深野寺鐘

江邊客舍

輕寒無賴入征裘  
野水閒雲總是愁  
極目遠山橫靄外  
數聲鳴櫓白蘋洲

詠盆梅

一聲羌笛晚風斜  
再問花期便覺賒  
茵幌泥沙可隨分  
莫將春意殢殘花





石倉歷代詩選卷二百十

欽定四庫全書

集部

石倉歷代詩選卷二百十一至

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣葉蘭

謄錄監生臣陳春熙

欽定四庫全書

石倉歷代詩選卷一百十一

明 曹學佺 編

宋詩八十八

徐經孫

題施山觀音閣

閣道連雲棧，簷牙覆竹陰。  
南來天馬渡，北落水龍吟。  
林鳥疑譚偈，田花欲布金。  
凭欄觀下界，洞見遠公心。

病中有感

習懶多成病旬餘久覆杯  
帳中聞燕語瓶裏看花開  
醫已肱三折愁來腸九迴  
何時得疎散屐齒印蒼苔

贈曾司戶

君家螺江頭我家劍江邊  
千載會相望飲水同一川  
竭來古梅關相識春風前  
高義軋層漢清譚響幽泉  
努力效佳哲勿為時俗牽

和黎丞梅關嶺

峭壁接高天間雲淡橫嶺稍便僧房靜未覺官曹冷風  
月兩閒人山川一佳境誰歟共茲樂老仙白垂領

丙戌年新春偶成

新年十許日才有一篇詩鄉思風中亂春心雨裏知病  
緣衰驟至懶與睡相宜暗想泉溪上杜鵑啼故枝

小英石峰

舊作英巖隱今為庾嶠行雖然一拳許有此數峰青峭  
崿驚凡目堅剛悖世情墨卿相指似只尺是蓬瀛

送大庾黎丞

客懷秋易惡送客更當秋薄宦相從久孤征肯暫留酒  
輕離思重目短大江流黃菊聊持贈寒香晚不羞

月夜赴郡會歸鞭轉不成寐觸事感懷

庾山高入雲章水清見骨山高晚宜梅水清寒浸月美  
人天一方雲烟妙空濶帶月簪梅花獨起舞殘雪

覺溪八景

今存  
其三

雷奔石壁間瀑瀉洞門側蜿蜒乘洪濤變化莫可測

右龍門春浪

山園古寺陰曙隔鯨音發悠揚三四聲喚上東林月

右隆福晚鐘

飄瀟鷗鷺羣浙瀝菰蒲晚雲斷山月明新泉落前澗

右驟塘暮雨

雜興

梅花亦何奇偏得幽人愛清寒風雪夜一枝靜相對

自贊夏端甫所繪真



老我不堪位置歸來久混漁樵忽然珠玉在側見之令  
人意消

出朝賦歸來好

歸來好籬下菊花應未老晚香猶可薦清樽淵明醉後  
和衣倒

歸來好一入山林迹如掃杜門謝客免慙尤几淨寔明  
讀莊老

恭和御製詩

多士新彈貢禹冠對天忠切動龍顏  
臚傳聲徹頒袍笏  
燕喜筵開肅珮環  
樂奏簫韶成廣內  
詩成全璧照人間  
微臣捧詔慚疎拙  
祇抱傳宣拜賜還

福州即景

一別居諸歲月增  
遙聞此景畫難能  
潮田種稻重收穀  
道路逢人半是僧  
城裏三山千簇寺  
夜間雙塔百枝燈  
常年六月東山裏  
地湧寒泉漱齒冰

長孫敏學授承務郎

辛勤場屋一書生六卷時文謾策名身事兩朝奚所補  
恩覃五世亦何榮前人慶澤宜豐報爾輩官曹詎可輕  
移孝為忠斯不負更須勤學繼家聲

送仲時弟

江關千里隔山川有弟能來慰眼前方喜鴈行隨處樂  
可堪蟾影別時圓暑行勿亟宜強飯湍激多驚莫問船  
歸到家山相勞苦團樂恰是菊花天

乙丑三月十二夜夢得家有園池樂壽康之句

覺而足成效邵康節作首尾吟

家有園池樂壽康  
閒中日月覺偏長  
睡餘攜杖遊花圃  
飯後呼童給鶴糧  
堆案縱橫書數冊  
隨盤歡喜酒盈觴  
客來問我渾無事  
家有園池樂壽康

附徐鹿卿詩

酬張直學

章水元通劍水流  
竭來庠序行同遊  
自從快蹋梅花雪  
一洗從前茅瘴秋  
官況我今忘獨冷  
鳴聲君合起相酬

龍光自有張華識句不驚人未便休

酬黎丞見和

極目龍門峻接天仕塗傾蓋便忘年太平官府閒吟竹  
勝處園林笑舉鞭松栢凌霜知獨後樓臺得月會居先  
老臣憂國誰能識飛雪飄飄上鬢邊

士友見和七月七日曝書依元韻謝之

寒儒家世派南州天遣芹宮並俊遊劍水章江千里月  
天孫河鼓一番秋曬書舊事聊同郝睽句新聲恐類侯

隔歲槐黃頻入夢曾知山角已生不

護法寺勸農呈史君

半載分符江水西何曾一日事遊嬉忽聞千騎傳呼曉  
正是三春勸相時父老倚鋤聽號令兒童騎竹望旌麾  
東風歸路歡聲滿野草間花索賦詩

興教寺勸農呈史君

自從幽雅無傳後漢有龔黃宋有羅夙駕朱輦勤勸相  
奉宣黃紙放催科一犁烟雨郊原曉千里春風嶺嶠和

看取便民橋下水滿江濃綠漲恩波

湛泉酌餞黎丈有詩壁間遂次其韻

幾人林下賦歸休公獨翩然汗漫遊  
味道不妨寒似水入時須用曲如鉤  
從來鄰父邀皆去底事官曹挽不留  
後夜相從那復得月明千里故山秋

陳府判邀遊梅關

庾嶺蒼蒼古復今公餘杖履愜幽尋  
兩崖峭壁風霜骨一片清泉佛祖心  
靜浣世緣揮酒椀更添春色上梅林

冥按翻覺詩情拙滿眼皆詩祇用吟

勸農上宮教

竹馬兒童喜欲狂循良太守似龔黃  
倉庚百轉蠶桑啟布穀一聲稷稻香  
耕饁盡陶豳國化嬉遊已徧舜民鄉  
文書便合登高閣為說東郊入務忙

愛山堂二絕句

橫江江上四山環少得當前面勢寬  
試上此堂舒遠目疎林盡處見峰巒



自有堂來三換扁官居賢否只山知醑醑嫵媚今何許  
山色青妍宛舊時

和杜子野湛泉詩來詩有塵事分清事之句

榕陰漠漠俯清泉淺溜涓涓不計年未必塵紛敗佳思  
凭欄得句却天然

鬱孤洞天

夢跨長虹海上遊寒生肌骨一壺秋好風吹得詩魂醒  
自寄雲間翠玉樓

附楊修詠六朝遺事

新宮

玉案金鑪對御牀  
巋然應是魯靈光  
螭頭直上雙魚尾  
不讓西京舊柏梁

靈和殿

得地恩深雨露偏  
丹墀左右玉階前  
君王屬意君知否  
恰似風流美少年

臺城

六朝遺跡好山川宮闕灰寒草樹烟江令白頭歸故國  
多情合賦黍離篇

石闕

雙石巍巍慰眼青滿朝珍重佐公銘官城府寺俱灰燼  
翻使夷人謾涕零

衛玠臺

年少才非洗馬才珠光碎後玉光埋江南第一風流者  
無復羊車過舊街

九日臺

甲光如水戟如霜  
御酒杯浮菊半黃  
東日西風滿天仗  
簫韶一部奏清商

東冶亭

忍淚相看酒共持  
一生心事幾人知  
年年折盡東亭柳  
此別綿綿無盡期

三山亭

滿目江山異洛陽  
北人懷土淚千行  
不如亡國中書令

歸老新亭是故鄉

儀賢堂

兩兩鶉衣白髮翁  
講筵談柄坐生風  
昭明太子歡相得  
應與商山四皓同

聽箏堂

鴈柱鸞絃十有三  
南山安石位嵒巖  
逡巡奏罷金滕曲  
堂上霑襟嘆不凡

蠶室

摘繭抽絲女在機  
茅簷葦箔舊堂扉  
年年桑柘如雲綠  
翻織誰家錦地衣

馳道

路平如砥直如絃  
官柳千株拂翠烟  
玉勒金鑣天下駿  
急於奔電更揮鞭

齊雲觀

上界笙歌下界聞  
縷金羅袖鬱金裙  
倚欄紅粉如花面  
不見巫山空暮雲

層城觀

亦名穿針樓

秋星如彈月如梳宮妓香添乞巧爐萬縷千針同一意  
眼穿腸斷得知無

秦淮

一氣東南王斗牛祖龍潛為子孫憂金陵地脉何曾斷  
不覺真人已姓劉

直瀆

晝役人功夜鬼功陽開陰闔幾時終不聞擲土江中語

爭得盈流一水通

橫塘

早潮纔過晚潮來一一軒窗照水開  
鑑面無塵風不動  
分明倒影見樓臺

青溪

傾城傾國兩妃嬪此地聞名不見人  
潛想舊時紅粉面  
落花風裏步香塵

北渠



金殿分來玉砌流  
黑龍湖撒鳳池頭  
後庭花落恩波斷  
翻與南塘作御溝

覆杯池

金杯覆處舊池枯  
此後還曾一醉無  
東晉中興股肱力  
元皇也學管夷吾

三巖石

蘿蔓藤花歲自添  
露痕還似雨痕霑  
莫將廢苑為閒地  
猶可巖巖作具瞻

半陽湖

江南龍節水為鄉水不純陰有半陽一片湖光共深淺  
兩般泉脈異溫涼

桃葉渡

桃葉桃根柳岸頭獻之才調頗風流相看不語橫波急  
艇子翻成送莫愁

麾扇渡

旌旗燦日刃凝霜甲光如龍人似狼羽扇一麾風偃草

策勲多謝顧丹陽

長命洲

梁武慈悲不鼎烹蒙恩恭養亦虛名狐狸口腹應潛飽  
就死多於日放生

應潮井

碧甃時時減復增山頭海面密相應古來泉脈誰穿透  
潮落潮生不甞澄

天闕山

牛頭天際碧凝嵐  
王導無稽示妄談  
若以遠山為上闕  
長安應合指終南

白楊路

殘枝敗葉幾霑春  
莫問栽培迹已陳  
細雨斜風恨無力  
蕭蕭滿路更愁人

射雉場

外作禽荒內色荒  
三千紅粉日嚴粧  
潘妃縱有嫣然態  
不步金蓮到射場

銅螭署

挈壺傳箭逼天聰鑄出螭螭巧範同何事腹中藏怪物  
人驚螭蜨氣如虹

焚衣街

短頭金縷又珠胎煙緒香雲晝不開御路旁人皆歎息  
逡巡紅焰作青灰

三斷石

孫吳紀德舊刊碑埋沒蟠螭與伏龜惆悵石岡三斷在

至今猶是鼎分時

獨足臺

鳥跡分明在帝臺  
管絃聲裏輒書來  
回頭一覺風流夢  
猶得朱門傍水開

燕雀湖

平湖岸側見高墳  
萬土銜來燕雀羣  
鑑面無波天一色  
此中文藻似儲君

洞元觀

葛玄功行滿三千白日驟鸞上碧天留得舊時壇宇在  
後人方信有神仙

白都山

駕鶴驟鸞自古聞策名仙籍是真君天邊舊迹無尋處  
滿目青山空白雲

春磧

手拖葛屨坐藁牀竹樹蕭然一水傍枕上白雲船下月  
卜鄰東磧勝東岡

明慶寺

翠壁如屏旱不枯一泓甘滑飲醍醐  
高僧到此聞絲竹  
還有金鱗對躍無



石倉歷代詩選卷二百十一